

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԵՐԵՎԱՆ ՔԱՂԱՔԻ ԱՎԱԳԱՆԻ

«---» մարտի 2014թ.

N ____ - Ա

ՈՐՈՇՈՒՄ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆԸ ԳՈՒՅՔ ՆՎԻՐԵԼՈՒ ՄԱՍԻՆ

Հիմք ընդունելով Հայաստանի Հանրապետության քաղաքացիական օրենսգրքի 594-րդ հոդվածը՝

Երևան քաղաքի ավագանին որոշում է.

1. Երևան համայնքի ենթակայության «Ն. Բ. Հակոբյանի անվան ընդհանուր հիգիենայի և մասնագիտական հիվանդությունների գիտահետազոտական ինստիտուտ» փակ բաժնետիրական ընկերության 100 տոկոս (17 հատ հասարակ (սովորական) բաժնետոմս, յուրաքանչյուրը՝ 6000 դրամ անվանական արժեքով) համայնքային սեփականություն հանդիսացող բաժնետոմսերը նվիրել Հայաստանի Հանրապետությանը՝ ի դեմս Հայաստանի Հանրապետության կառավարության:

2. Առաջարկել Երևանի քաղաքապետին՝ սույն որոշումն ուժի մեջ մտնելուց հետո Հայաստանի Հանրապետության օրենսդրությամբ սահմանված կարգով ապահովել «Ն. Բ. Հակոբյանի անվան ընդհանուր հիգիենայի և մասնագիտական հիվանդությունների գիտահետազոտական ինստիտուտ» փակ բաժնետիրական ընկերության բաժնետոմսերի հանձնման-ընդունման աշխատանքների կատարումը՝ կնքելով բաժնետոմսերի նվիրատվության մասին պայմանագիր:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ

ՏԵՂԵԿԱՆՔ-ՀԻՄՆԱՎՈՐՈՒՄ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆԸ ԳՈՒՅՔ ՆՎԻՐԵԼՈՒ ՄԱՍԻՆ» ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԱՆՀՐԱԺԵՇՏՈՒԹՅԱՆ ՎԵՐԱԲԵՐՅԱԼ

ՀՀ կառավարության 2003թ հոկտեմբերի 30-ի «Երևան քաղաքի առողջապահական հաստատությունների օպտիմալացման շրջանակներում մի շարք բաժնետիրական ընկերություններ և պետական ոչ առարարային կազմակերպություններ վերակազմակերպելու մասին» N1413-Ն որոշմամբ «Ն.Բ.Հակոբյանի անվան ընդհանուր հիգիենայի և մասնագիտական հիվանդությունների գիտահետազոտական ինստիտուտ» փակ բաժնետիրական ընկերությունը ՀՀ առողջապահության նախարարության ենթակայությունից անցել է Երևանի քաղաքապետարանի ենթակայությանը և վերակազմակերպման արդյունքում միաձուլվել է «Քանաքեռ-Զեյթուն» բժշկական կենտրոն» փակ բաժնետիրական ընկերությանը և մինչև 2012թ հունիս ամիսը գործել է հիշյալ կազմակերպության կազմում:

Երևան քաղաքի ավագանու 2011թ հունիսի 24-ի «Քանաքեռ-Զեյթուն» բժշկական կենտրոն» փակ բաժնետիրական ընկերությունը վերակազմակերպելու մասին» N260-Ա որոշմամբ «Ն. Բ. Հակոբյանի անվան ընդհանուր հիգիենայի և մասնագիտական հիվանդությունների գիտահետազոտական ինստիտուտ» փակ բաժնետիրական ընկերությունը առանձնացել է «Քանաքեռ-Զեյթուն» բժշկական կենտրոն» փակ բաժնետիրական ընկերությունից:

Ընկերության ստեղծման օրվանից գործունեության հիմնական ուղղություններից է հանդիսացել աշխատավոր բնակչության աշխատանքի պայմանների և մասնագիտական հիվանդությունների ուսումնասիրությունը: Համաձայն կանոնադրության Ընկերությունը փորձարարական, կլինիկական և հիգիենիկ ոլորտներում պետք է կատարի գիտական հետազոտություններ, իրականացնի բնակչության որակյալ բժշկական օգնություն և սպասարկում, ինչպես նաև մասնագիտական հիվանդությունների ախտորոշում և տրամադրի վերջնական փորձագիտական եզրակացություն: Ընկերությունը 2013թ համար պայմանագիր ունի կնքած միայն ՀՀ կրթության և գիտության նախարարության գիտական պետական կոմիտեի հետ, համաձայն որի պետք է կատարի շրջական միջավայրի

աղտոտվածության վրա պղնձի արդյունահանող և արտադրող ձեռնարկությունների ազդեցության ուսումնասիրություն, գնահատի արտադրության արտանետվածքների բժշկական սաքանական հետևանքները, ինչպես բանվորների, այնպես և բնակչության առողջության վրա ու հիմնավորի դրանց կանխարգելման ուղիները:

Ընկերությունը չունի գործունեության իրականացման լիցենզիա, գույքի սեփականության իրավունքը հավաստող համապատասխան փաստաթղթեր:

Հաշվի առնելով վերը նշվածը, ինչպես նաև այն, որ Ընկերությունը իրականացնում է հանրապետական նշանակության գիտական, գիտա-տեխնիկական, փորձագիտական գործունեություն, ուստի Ընկերության բաժնետոմսերի կառավարման լիազորություններն առավել արդյունավետ իրացնելու, հետագա զարգացումն ապահովելու, համար նպատակահարմար կլինի դրանք հանձնել Հայաստանի Հանրապետությանը՝ ի դեմս ՀՀ առողջապահության նախարարության:

Միաժամանակ տեղեկացնում ենք, որ ՀՀ առողջապահության նախարարության կողմից առկա է նախնական համաձայնություն:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ

ՏԵՂԵԿԱՆՔ

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆԸ ԳՈՒՅՔ ՆՎԻՐԵԼՈՒ ՄԱՍԻՆ»
ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԿԱՊԱԿՑՈՒԹՅԱՄԲ
ԵՐԵՎԱՆ ՔԱՂԱՔԻ ԲՅՈՒՋԵԻ ԵԿԱՄՈՒՏՆԵՐՈՒՄ ԵՎ ԾԱԽՍԵՐՈՒՄ ՍՊԱՍՎԵԼԻՔ
ՓՈՓՈԽՈՒԹՅՈՒՆՆԵՐԻ ՎԵՐԱԲԵՐՅԱԼ**

«Հայաստանի Հանրապետության կառավարությանը գույք նվիրելու մասին» որոշման նախագծի ընդունման կապակցությամբ Երևան քաղաքի բյուջեի եկամուտներում և ծախսերում փոփոխություններ չեն առաջանում:

ՏԵՂԵԿԱՆՔ

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆԸ ԳՈՒՅՔ ՆՎԻՐԵԼՈՒ ՄԱՍԻՆ»
ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԱՌՆՉՈՒԹՅԱՄԲ
ԱՅԼ ԻՐԱՎԱԿԱՆ ԱԿՏԵՐԻ ԸՆԴՈՒՆՄԱՆ ԱՆՀՐԱԺԵՇՏՈՒԹՅԱՆ ԿԱՄ ԲԱՑԱԿԱՅՈՒԹՅԱՆ
ՎԵՐԱԲԵՐՅԱԼ**

«Հայաստանի Հանրապետության կառավարությանը գույք նվիրելու մասին» որոշման նախագծի ընդունման առնչությամբ այլ իրավական ակտերի ընդունման անհրաժեշտություն չի առաջանում:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ